



**სსიპ სახელმწიფო
შესყიდვების
სააგენტო**

21 / იანვარი / 2025 წ.



KA080142170362225

№ 168

განკარგულება

შპს „ნორთ გრუპის“ შავ სიაში დარეგისტრირების შესახებ

შემსყიდველი ორგანიზაცია: ნალკის მუნიციპალიტეტის მერია;

ტენდერის ნომერი: NAT240011919;

შესყიდვის ობიექტი: 37400000 - სპორტული საქონელი და აღჭურვილობა - (ინვენტარი);

მიმწოდებელი: შპს „ნორთ გრუპ“ (ს/ნ: 426539463);

წერილობითი შეტყობინების საფუძველი: სახელმწიფო შესყიდვის შესახებ ხელშეკრულებით ნაკისრი ვალდებულებების შეუსრულებლობა.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2024 წლის 18 დეკემბერს წარმოდგენილ იქნა ნალკის მუნიციპალიტეტის მერიის 2024 წლის 18 დეკემბრის № 118-1182435319 წერილობითი შეტყობინება (რეგისტრაციის № 10939), რომლითაც სააგენტოს ეცნობა შპს „ნორთ გრუპის“ (ს/ნ: 426539463) მიერ NAT240011919 ელექტრონული ტენდერის საშუალებით დადებული 2024 წლის 22 ივლისის № 1/86 სახელმწიფო შესყიდვის შესახებ ხელშეკრულებით ნაკისრი ვალდებულებების შეუსრულებლობის თაობაზე.

1.2. სააგენტომ შპს „ბრენდს“, სახელმწიფო შესყიდვების ერთიან ელექტრონულ სისტემაში მის პროფილში მითითებული ელექტრონული ფოსტის მისამართის northgroupgeorgiallc@gmail.com მეშვეობით, 2024 წლის 24 დეკემბრის №3696 წერილით, აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა. მიმწოდებელს განმარტება არ წარმოდგენია.

2. შემსყიდველი ორგანიზაციის პოზიცია

შემსყიდველი ორგანიზაციის წერილობითი შეტყობინების თანახმად, მიმწოდებელმა ვერ შეასრულა 2024 წლის 22 ივლისის №1/86 სახელმწიფო შესყიდვის შესახებ ხელშეკრულებით ნაკისრი ვალდებულებები, რის გამოც ხელშეკრულება ცალმხრივად შეწყდა.

3. მიმწოდებლის პოზიცია

ადმინისტრაციული წარმოების ფარგლებში მიმწოდებელს განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2024 წლის 22 ივლისს, NAT240011919 ელექტრონული ტენდერის საშუალებით, ნალკის მუნიციპალიტეტის მერიასა და შპს „ნორთ გრუპს“ (ს/ნ: 426539463) შორის დაიდო № 1/86 სახელმწიფო შესყიდვის შესახებ ხელშეკრულება, რომლის თანახმად, მიმწოდებელს შემსყიდველი ორგანიზაციისთვის უნდა მიეწოდებინა საქონელი ხელშეკრულების გაფორმებიდან 20 კალენდარული დღის ვადაში, 2024 წლის 12 აგვისტოსთვის. ხელშეკრულების ღირებულებად განსაზღვრა 25 555 ლარი, ხოლო მოქმედების ვადად – 2024 წლის 30 დეკემბერი.

4.2. საქმეში არსებული შემსყიდველი ორგანიზაციის 2024 წლის 24 სექტემბრის № 118-1182426822 წერილით დგინდება, რომ მიმწოდებელი ვერ ასრულებდა ნაკისრ ვალდებულებებს. ამავე წერილით, მიმწოდებელს ეცნობა, რომ თუ იგი გონივრულ ვადაში არ მიაწვდიდა საქონელს შემსყიდველ ორგანიზაციას, ხელშეკრულება ცალმხრივად შეწყდებოდა.

4.3. მიმწოდებელმა 2024 წლის 24 ნოემბრის № 1/02-24112024-1 წერილით, შემსყიდველ ორგანიზაციას განუმარტა, რომ საქონლის მწარმოებელ კომპანიას შეექმნა წარმოების პრობლემა. ამდენად, მიმწოდებელი ვერ ახერხებდა შემსყიდველი ორგანიზაციისთვის საქონლის მიწოდებას.

4.4. ხელშეკრულებით ნაკისრი ვალდებულებების შეუსრულებლობის გამო, შემსყიდველმა ორგანიზაციამ 2024 წლის 9 დეკემბრის № 118. 118243441 ბრძანებით, ხელშეკრულება ცალმხრივად შეწყვიტა.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „ნორთ გრუპს“ უნდა დარეგისტრირდეს შავ სიაში.

6. გამოყენებული სამართლებრივი აქტები

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. განსახილველ შემთხვევაში, დგინდება, რომ მიმწოდებელმა არაჯეროვნად შეასრულა 2024 წლის 22 ივლისის № 1/86 სახელმწიფო შესყიდვის შესახებ ხელშეკრულებით ნაკისრი ვალდებულებები, რის გამოც ხელშეკრულება ცალმხრივად შეწყდა. გარდა ამისა, სააგენტო ყურადღებას ამახვილებს საქმეში არსებულ მიმწოდებლის 2024 წლის 24 ნოემბრის № 1/02-24112024-1 წერილზე და განმარტავს, რომ მიმწოდებლის მიერ მითითებული გარემოება (საქონლის მწარმოებელ კომპანიას შეექმნა წარმოების პრობლემა) არ წარმოადგენს მისი პასუხისმგებლობის გამომრიცხავ ან შემამსუბუქებელ პირობას, რამდენადაც სახელმწიფო შესყიდვის შესახებ ხელშეკრულების დადებით მიმწოდებელმა იკისრა ხელშეკრულებით ნაკისრი ვალდებულებების ჯეროვნად შესრულების ვალდებულება და იგი როგორც ხელშეკრულების მხარე პასუხს აგებს კონტრაქტორი კომპანიის ქმედებაზე. ამდენად, საქმეში არსებული გარემოებების შეფასებისა და ურთიერთშეჯერების საფუძველზე, არსებობს მიმწოდებლის გაფრთხილების ან შავ სიაში დარეგისტრირების წინაპირობა.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის

სიმძიმეს, პრეტენდენტის/მიმწოდებლის მანამდე მიღებული გაფრთხილების ან/და შავ სიაში რეგისტრაციის ფაქტ(ებ)ს.

7.5. აღსანიშნავია, რომ შპს „ნორთ გრუპს“ (ს/ნ: 426539463) 2024 წლის 19 ივლისს მიეცა გაფრთხილება NAT230023342 ელექტრონული ტენდერის საშუალებით დადებული 2023 წლის 29 დეკემბრის № 2/83 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების გამო. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის 51 პუნქტის თანახმად, გაფრთხილება გამოიყენება ერთხელ და იგი მოქმედებს ერთი წლის განმავლობაში. შპს „ნორთ გრუპის“ გაფრთხილების მოქმედების ვადა იწურება 2025 წლის 19 ივლისს.

7.6. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტის თანახმად, შავ სიაში დარეგისტრირების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი ინფორმაცია სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს და არ არის სახეზე შავ სიაში დარეგისტრირებაზე უარის თქმის ან გაფრთხილების საფუძველი.

7.7. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. ამასთან, სახეზეა მიმწოდებლის შავ სიაში დარეგისტრირების წინაპირობა და არ არსებობს მისი შავ სიაში დარეგისტრირებაზე უარის თქმის ან გაფრთხილების საფუძველები, რადგან მიმწოდებელმა ვერ შეასრულა ხელშეკრულებით ნაკისრი ვალდებულებები. შესაბამისად, მოცემული დარღვევისა და მიმწოდებლის მანამდე არსებული გაფრთხილების ფაქტის გათვალისწინებით, შპს „ნორთ გრუპ“ უნდა დარეგისტრირდეს შავ სიაში.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტით და დაადგინა:

1. შპს „ნორთ გრუპ“ (ს/ნ: 426539463) 2025 წლის 22 იანვარს დარეგისტრირდეს შავ სიაში.
2. ამ განკარგულების აღსრულება დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს.
3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი №64), კანონმდებლობით დადგენილი წესით.

თავმჯდომარე

ხელმოწერილია/
შტამგდამსულია
ელემენტორულად



ლევან რაზმაძე